

Dios Tata ta mara bo **Yamada** na famia. Tur kos tin di aber ku famia. Tur kos ta kuminsá den abo su kas. Si **Dios Tata** a revelá abo un tiki di su **Fiestanan** i kiko nan ta nifiká, anto abo no bai kuminsá ku e tiki ku abo tin, **Dios Tata** no por duna abo mas, pasobra **Palabra** ta bisa "Esun ku ta fiel den un kos masha chikitu, ta fiel tambe den hopi"(**Lukas 16:10**). **Dios Tata** no ta **Obligá**, **Oprimí** òf **Ordená** abo pa **Obedesé**, pasobra abo tin un **Boluntat liber** i **Dios Tata** ta **Omnipotente**. Ora abo bai sigui e tiki ku **Dios Tata** a revelá e ora ei **El** ta **Oumentá** e tiki ku **El** a revelá kaba.

Dios Tata ta yama abo na bo nòmber. Abo su **Yamada** ta den **Kristu Hesus**. **Dios Tata** a yama Abram na su nòmber pa e i su famia sigui **Dios Tata** (**Génesis 12:1**).

Dios Tata a yama Moisés na su nòmber pa e i henter e nashon **Israelita** sigui **Dios Tata** (**Éksodo 3:12**).

Dios Tata a yama Hosue i su kas pa sigui **Dios Tata** (**Hosue 24:15**).

Abo su **Yamada** ta mara na **Kristu Hesus**. Ta pa esei tur kos den **Beibel** ta reflehá **Kristu Hesus**. Henter **Torah** (**Génesis**, **Éksodo**, **Levítiko**, **Numbernan**, **Deutoronomio**), ta kontené **Kristu Hesus**, **Mesias** anto no un biaha pero mas di mil biaha, si abo bai lesa kiko e nifikashon ta di loke tin skirbi den **Hebreo**. Un ehèmpel; e **Tabernakel** ta **Kristu Hesus**. Tur e materialnan ku a wòrdu usa; oro, plata, bròns. Tur e kolonan di paña; blanku, blou, púrpura i skarlata. Tur e kueru kabritu, karné chubatu tiñá kòrá, kueru di dólfein. Palu di akasia, piedra di òneks i piedra pa montura. Tur e midi nan i tur e ophetonan di e **Tabernakel**. Tur kos di e **Tabernakel** tin un nifikashon i tur ta musta i dirigí nos riba nos **Redentor**, **Yeshua Mesias**, **Esun Ungi**.

Kristu Hesus, **Mesias** a bisa tres biaha: "**Ami** ta e **Porta**". Den **Juan 10:1-9**, **Kristu** a bisa nan dos biaha: "**Ami** ta e **Porta**". Loke nan no a komprendé i hopi no ta komprendé te ku awe e nifikashon. E di tres biaha ku **Kristu** a bisa "**Ami** ta e **Porta**", **El** a bisa nan na un manera ku tabata simplemente klaro ken **Kristu Hesus** ta. Den **Juan 14:6-7** **Kristu** a bisa: "**Ami** ta e **Kaminda**, i e **Bèrdat**, i e **Bida**; ni un hende no ta bin serka e **Tata**, sino pa medio di **Ami**. Si boso tabata konosé **Ami**, boso lo a konosé **Mi Tata** tambe; i for di awor padilanti boso konosé **E** i a mira **E**."

Awor e **Tabernakel** tabata tin **tres paseo**:

E patio pafó (1), e patio paden (2) i e **Santísimo** (3).

Pa drenta e patio pafó (1), abo mester a pasa dor di e **Porta** di kura (1=the gate).

Pa drenta e patio paden (2), abo mester a pasa dor di e **Porta** kas (2=the door).

Pa drenta e **Santísimo** (3), abo mester a pasa dor di e **Kortina** (3=the veil).

Loke no ta skirbi den **Beibel** ta loke e **Israelitanan** tabata yama e **tres paseonan** aki, di e **Tabernakel**.

E **Porta** di kura (1=the gate), tabata wòrdu yama e **Kaminda**.

E **Porta** kas (2=the door), tabata wòrdu yama e **Bèrdat**.

E **Kortina** (3=the veil), tabata wòrdu yama e **Bida**.

Es desir **Kristu Hesus** a bisa nan: "**Ami** ta e **Porta**" = (e **Kaminda i** e **Bèrdat**).

Despues **Kristu Hesus** a bisa bon kla: "**Ami** ta e **Kaminda**, i e **Bèrdat**, i e **Bida**" = (**Porta kura, Porta kas i Kortina**).

Ta pa e motibu aki solo a bira skur i e **Kortina** a sker di ariba bin te abou (**Lukas 23:45**) i te dia di awe no tin niun **Tabernakel**.

Kristu Hesus, Yeshua Mesias, Esun Ungi ta nos **Tabernakel**.

Kristu Hesus, Yeshua Mesias, Esun Ungi ta nos **Yamada**.

Kristu Hesus, Yeshua Mesias, Esun Ungi ta nos **Bèrdat**.

24 mart 2017

Sea Bendishoná den e Amor di Yeshua Mesias

Rev. Remsly L Riley